

# Jano Blacas de la Pampeto

## La Titourello



**C.I.E.L. d'Oc**

*Centre International de l'Écrit en Langue d'Oc*

3 Place Joffre, 13130 Berre L'Étang

<http://www.lpl.univ-aix.fr/guests/ciel/>

## Chois Gousto-Soulet

Lou nas caviha au mitan de sa caro boudenflo, gros coume un tartifle greia à la primo, d'auriho que se n'escapon de péu fouletin blanquinèu, d'iue rajòu de sourso claro superbe, uno lipo bountouso chuchant de-longo soun cachimbau, vaqui Choïs, Choïs Gousto-Soulet que ié dison.

Qu'es pas vrai, Diéu garde! Sachessias soun amour destenembra pèr li cat, que si! Se recampon au siéu, de jour, de niue, pèr licouneja li sietoun pausa au sòu de pertout dins soun oustau. A viéure soulet, a afiha tóuti li cat dóu vesinage, maigre coume d'escouden, que se dèvon countenta dis escourriho de la bouito à bourdiho, tóuti li pàuri mesquin di catounado, óublida dins la paio de la feniero vo souto quauco panoucho dins la remisio. Un bèu jour, abrama de fam, ferouge, li diabloutin fan babau e seguissènt li piado de sis einat, s'adraion devers lou bastidounet de Choïs. Aqui, trobon taulo meso, uno saco estrassado pèr s'encabedela subre e de caranchouneto à plus fin que l'ome ié vòu tant de bèn.

Li bèsti soun sis amigo. Rabaiè meme un chin qu'avié plus qu'à bada e mouri dins lou sournun de la porto carretiero ounte l'avien, segur, vergougousamen abandouna. Plourinejavo e narrejavo à pichot cop. L'aduguè bèn au caud sus soun estouma. Hoi! Ero pas poulit emé sa cambo roubino e sis iue póutihous. Mai Choïs e Petadou soun ami cinq sòu. Tóuti dous n'an degu counèisse de man revesso. Basto! Pièi, lou chin e li cat se debequignon pas que lou paure bougre a trop pica de gip pèr noun parteja sa pitanço.

A l'ouro d'aro, asseta sus un bancau qui lis an achancriguèron, Choïs Gousto-Soulet tiro de plan sus la coumeto. Sa vido tant lèu escampihado siguè estrambourdanto. N'i'en soubro que li marrit jour. Pamens, sarié mestié que se remembrèsse pèr lou menut la sequèlo d'avengudo que lou faguèron courre la bello eisservo.

Dintre soun bastidoun es urous coume un rèi: mai qu'ague proun de sòu pèr se paga sa tubèio e adouba la soupo à sa ramado de bèsti!

La niue encro l'us. Avans que de s'ajouca, Choïs tiro de dessouto lou cèndre, un gros code de Durènço, l'apataiounis dins de papié journau e lou recantouno dins li linçòu. Bèn restregnu souto lou plumoun, se boufo li det. Coume es caudet, un restaura! E si souveni de se descabedela just avans que la som lou brèsse, au calabrun de si pensado d'ome fa que manjo dins si cinquante an... emé lou chèchi.

- - -

## Pichouline

A plóugu de-longo, aniué, uno d'aquéli plueio fino, i cance de l'ivèr, qu'escoulanton tout en lònquis estirado.

Choïs Gousto-Soulet a pas pouscu plega parpello, que tenguè d'à ment lou